



## GRAD TUZLA

Na osnovu tačke VI Pravilnika o utvrđivanju uslova, kriterija i postupka dodjele nepovratnih sredstava za novčanu podršku privrednim subjektima na području grada Tuzla („Službeni glasnik Grada Tuzla“, broj: 6/18), Služba za ekonomski razvoj i društvene djelatnosti Grada Tuzla, dana **21.06.2018.godine**, objavljuje:

### JAVNI POZIV

**za učešće u Programu raspodjele sredstava iz Budžeta Grada Tuzla namjenjenih za podršku privrednim subjektima na području grada Tuzla za 2018. godinu**  
**Projekat: “Zapošljavanje i nova radna mjesta”**

#### I Predmet Javnog poziva

Javnim pozivom prikupljaju se aplikacije (prijave) privrednih subjekata koji otvaraju nova radna mjesta i zapošljavaju, odnosno stručno osposobljavaju za rad osobe na području grada Tuzla u 2018. godini.

Pod pojmom privredni subjekti podrazumijevaju se samostalne djelatnosti i privredna društva.

#### II Iznos novčane podrške

Ukupan iznos sredstava predviđen za ovaj Projekat je **250.000,00 KM** (dvijestotinepedeset hiljada KM), a iznos novčane podrške po jednom zaposlenom radniku je **2.000,00 KM** (dvije hiljade KM). Podrška je usmjerena na sufinansiranje uplata doprinosa za PiO i zdravstveno osiguranje, dok plaću za zaposlenika obezbjeđuje poslodavac. Obaveza poslodavca je da osobu za koju je dobio novčanu podršku primi u radni odnos po osnovu ugovora o radu sa rokom zapošljavanja najmanje 6 (šest) mjeseci uz obavezu zadržavanja još najmanje 3 (tri) mjeseca nakon isteka podrške.

Po ovom Projektu cilj je novčano podržati zapošljavanje 125 osoba.

Osoba koja se zapošljava mora se voditi na evidenciji nezaposlenih kod Javne ustanove Služba za zapošljavanje TK- Biro za zapošljavanje Tuzla. U ovu kategoriju spadaju i osobe koje su zaposlene u 2018. godini, a bile su na evidenciji nezaposlenih kod JU Služba za zapošljavanje TK- Biro za zapošljavanje Tuzla.

Broj zaposlenih za koje se može dati novčana podrška zavisi od ukupnog broja zaposlenih, tako da:

- poslodavci koji imaju do 3 zaposlena, bez osobe koja se zapošljava u 2018. godini, mogu ostvariti novčanu podršku za jednu osobu koju zapošljavaju u 2018. godini,
- poslodavci koji imaju od 4 do 6 zaposlenih, bez osoba koje zapošljava u 2018. godini, mogu ostvariti novčanu podršku za dvije osobe koje zapošljavaju u 2018. godini,

- poslodavci koji imaju od 7 do 10 zaposlenih, bez osoba koje zapošljavaju u 2018. godini, mogu ostvariti novčanu podršku za tri osobe koje zapošljavaju u 2018. godini,
- poslodavci koji imaju više od 10 zaposlenih, bez osoba koje zapošljavaju u 2018. godini, mogu ostvariti novčanu podršku za pet osoba koje zapošljavaju u 2018. godini.

### **III Pravo učešća**

Pravo učešća u ovom Projektu mogu ostvariti privredni subjekti koji ispunjavaju sljedeće uslove:

- da imaju registrovanu poslovnu djelatnost na području grada Tuzla,
- da nezaposlenu osobu s evidencije Biroa za zapošljavanje Tuzla ima namjeru zaposliti po osnovu ugovora o radu na neodređeno vrijeme ili na određeno vrijeme sa rokom zapošljavanja, najmanje na devet mjeseci, ili je to u ovoj godini već učinio,
- da redovno izmiruje obaveze po osnovu javnih prihoda.

Aplikanti će biti isključeni iz učešća u pozivu ili iz dodjeljivanja sredstava novčane podrške, ako su u trenutku raspisivanja javnog poziva:

- (a) krivi za davanje lažnih informacija u prijavnom obrascu, koje su preduslov za učestvovanje u pozivu za novčanu podršku ili ako nisu dostavili potrebne informacije;
- (b) ukoliko su u posljednja 3 mjeseca od raspisivanja javnog poziva otpuštali radnike, izuzev u slučaju smrti radnika, odlaska u penziju radnika, u slučaju otkaza radniku kao rezultat vođenja disciplinskog postupka ili zahtjeva radnika za sporazumnim raskidom radnog odnosa;
- (c) ukoliko nisu uredno ispunili obaveze iz prethodno sklopljenih ugovora o odobravanju novčane podrške iz sredstava Budžeta Grada Tuzla.

**Za dodjelu novčane podrške ne mogu aplicirati subjekti koji imaju status javne ustanove ili javnog preduzeća.**

### **IV Način prijavljivanja**

Prijave na Javni poziv podnose se na prijavnom obrascu kojeg je propisala Služba za ekonomski razvoj i društvene djelatnosti Grada Tuzla.

Prijavni obrazac sa izjavom može se preuzeti na zvaničnoj web stranici Grada Tuzla ([grad.tuzla.ba](http://grad.tuzla.ba)), ili u Centru za pružanje usluga građanima (šalter sala Grada Tuzla).

Uz prijavni obrazac aplikanti su dužni priložiti sljedeće dokumente:

1. dokaz o registraciji privrednog društva ili samostalne djelatnosti (kopija);
2. obavijest o razvrstavanju prema djelatnosti izdata od Zavoda za statistiku (kopija);
3. broj računa u poslovnoj banci na koji će sredstva biti uplaćena;
4. karton deponovanih potpisa osoba ovlaštenih za zastupanje (kopija);
5. uvjerenje o izmirenim obavezama po osnovu javnih prihoda, izdato od Porezne uprave Tuzla, ne starije od 30 dana (original ili ovjerena kopija);

6. lista osiguranih lica za obveznike koja uključuje i odjavljena lica, izdata od Porezne uprave Tuzla, ne starija od 30 dana (original ili ovjerena kopija);
7. uvjerenje da se protiv aplikanta, odnosno lica ovlaštenih za zastupanje ne vodi krivični postupak i da nije pravosnažno osuđen za prekršaj i/ili počinjenje krivičnog djela, ne starije od 30 dana;
8. spisak osoba koje aplikant namjerava zaposliti, sa uvjerenjem da se vode na evidenciji nezaposlenih kod JU Služba za zapošljavanje TK- Biro za zapošljavanje Tuzla, ne starije od 30 dana od dana predaje prijave na pisarnicu Grada Tuzla;
9. izjava ovjerena u Centru za pružanje usluga građanima (šalter sala Grada Tuzla) ili kod notara. (Obrazac Izjave je u prilogu Prijavnog obrasca);
10. Lista za provjeru.

## **V Provjera aplikacija (prijava)**

Postupak dodjele sredstava za novčanu podršku privrednim subjektima provodi Komisija za ocjenu prijava, koja po okončanju provjere zaprimljenih prijava iste ocjenjuje i sačinjava listu o odabiru korisnika. Lista o odabiru korisnika dostavlja se učesnicima javnog poziva preporučenom pošiljkom i objavljuje na oglasnoj ploči Grada Tuzla i na zvaničnoj web stranici Grada Tuzla.

Detaljni uslovi korištenja sredstava na ime dodijeljene novčane podrške regulisat će se ugovorom između Grada Tuzla i odabranih korisnika.

## **VI Trajanje javnog poziva i podnošenje aplikacija (prijava)**

**Javni poziv je otvoren do utroška sredstava.**

Prijave na Javni poziv sa pratećom dokumentacijom dostavljaju se u zatvorenoj koverti putem Centra za pružanje usluga građanima (protokol Grada Tuzla) ili preporučeno poštom na adresu:

### **GRAD TUZLA**

**Služba za ekonomski razvoj i društvene djelatnosti  
Ul. ZAVNOBIH-a broj 11, 75000 Tuzla, Bosna i Hercegovina**

sa naznakom:

**Prijava za učešće u Programu raspodjele sredstava iz Budžeta Grada Tuzla namjenjenih  
za podršku privrednim subjektima na području grada Tuzla za 2018. godinu  
Projekat: “Zapošljavanje i nova radna mjesta” – ne otvarati!**

Sve dodatne informacije o načinu i postupku učešća u Javnom pozivu, mogu se dobiti u Službi za ekonomski razvoj i društvene djelatnosti Grada Tuzla, direktno ili putem telefona: 035/307-380.